



Uunga siunnersuut: Qalerallit avataasiorluni aalisarnermi pisarineqartut akitsuutaat pillugu Inatsisartut inatsisaata allanngortinneqarnera pillugu Inatsisartut inatsisaat nr. XX, XX. XXX 2014-imeersoq.

(Aningaasaqarnermut Nunamullu Namminermt Naalakkersuisoq)
(Siullermeenera)

Naalakkersuisut siunnersuummik pitsaasumik saqqummiussigaluarput, tassani siunnersuutigigamikku avaleraasaqqortuut angallatinit Kalaallit Nunaanni angerlarsimaffeqartunit pisarineqartut kiilumut 0,3 koruuninik akitsuuserneqassasut kiisalu angallatit Danmarkimi, Savalimmiuni nunanilu allani angerlarsimaffeqartunit pisarineqartut kiilumut 1,10 koruuninik akitsuuserneqassasut. Siunneruut akisussaassuseqarpoq tamannalu tunngavigalugu ima allappunga:

Demokraatini oqaaseqarnerput aallarnerlugu innuttaasunut partiit Siumut Atassullu qanoq akisussaassuseqanngitsuliortigisut eqqaasitsissutigissuarput. Tassami 2014-mut Aningaasanut Inatsisissap pingajussaaneerneranut atatillugu misileraalluni makrelinik aalisarnermi qaqitassat killeqanngiusartumik akitsuusersorneqarnialeraluarput.

Partiit taakku marluk takorluuillutik aallartippat kiilumut 2 koruuninik akitsuusiisoqarsinnaasoq. Tamatuma kingorna angusaqarluarusussusaat nakkariarpoq naggataatigullu Aningaasanut inatsisissaq akuerineqarpoq immikkut oqaasertalerlugu, kiilumut 1,50 koruuninik akitsuusiisoqarnissaa innersuussutigineqartoq.

Demokraatit allallumi taamanili oqaatigaat taama qaffasitsigisumik akitsuusiiniarneq piviusorsiuungitsoq tamatumalu kingunereriaannaagaa makrelinik aalisartoqanngilluinnarnera.

Siumulli Atassutillu anneruniarlutik aalajangiusimavaat ajornavianngitsoq. Ullumikkulli siunnersuutip suliarilikkatta qujanartumik takutippaa, Naalakkersuisut arlaatigut tunuliaquttatik akisussaassuseqanngitsuliorniarsarisut paasitissimavaat piviusorsiuungitsumik annaaraluni akitsuusersuiniartoqarsinnaanngitsoq neriuutigalugu aningaasarpasuit Landskarsimut nakkaalerumaartut. Pissutsit piviusut taamaanngillat aamma Naalakkersuisut qutsavigerusuppakka tunuliaquttatik inississimammatigit.

Pivisuuvorli ullumi siunnersuut suliarigatsigu siunertaqartoq makreliit qaqitat kiilumut 0,30 koruuninik akitsuuserneqarnissaannik angallatit Kalaallit Nunaanni nalunaarsorneqarsimasut



atorlugit aalisartoqarsimappat taavalu 1,10 koruuninik kiilumut akitsuusiisoqassasoq angallatit Danmarkimi, Savalimmiuni nunanilu allani nalunaarsorneqarsimasut atorlugit aalisartoqarsimappat. Miserratissaanngitsumik akitsuutit Siumup Atassutillu qaammatialunnguit matuma siorna eqqarsaataannarsorlutik akitsuusersuiniarnerannut naleqqiullugit appasinneroqaat.

Demokraatini isumaqarpugut, inuiaqatigiit tamatta pisuussutigut – aalisagaagaluarpata aatsitassaagaluarpataluunniit – inuiaqatigiinnut tamanut iluaqutaasariaqartut, taamaattumik paasisinnaavarput makrelinik aalisarnermi qaqitat akitsuuserusunneqarmata. Iluarisimaarparput una siunnersuut akitsuummik piviusorsiortumik tunngaveqarmat taamaattumik siunnersuutip Aningaasaqarnermut Akileraartarnermullu Ataatsimiititami suliarineqarnissaa innersuussutigaarput.

Tallimangornermi ulloq 21. marts Naalackersuisut Siumup Atassutillu partigruppiisa iluini akisussaassuseqanngitsunut ajorsarsimagunarput. Demokraatinimi paasivarput allannguutissamik siunnersuuteqartoqarsimasoq, avaleraasaqortoqut angallatinit sumiluunniit angerlarsimaffeqartunit pizarreqartut kiilumut 1,50 koruuninik akitsuuserneqartussanngorlugit. Tamatuma siunnersuutip nutaap avaleraasaqortoorniarneq annertuumik ajoqusissavaa aamma taamaattumik Siumup Atassutillu tamakkiisumik akisussaaffigisariaqarpaat aalisarnerup piviusunngunngitsoorsinnaanera. Ataatsimut isigalugu isertitassanik annaasaqarfiussaaq suliffissanillu. Taaneqartut tamaasa atorfissaqartilluaraluarpagut.

Taamatut oqaaseqarluta siunnersuutip Aningaasaqarnermut Akileraartarnermullu Ataatsimiititami suliarineqarnissaa innersuussutigaarput, tassani sakkortuumik qinnutigissavarput ilaasortat allannguutissamik siunnersuuteqaqqullugit, Naalackersuisut siunnersuutigeqqaagaannut assigusumik.